

東

華

錄

東華錄

順治二十三

臣王先謙敬編

臣周澗蕃恭校

秋七月戊子朔諭吏部朕聞原任戶部侍郎今補廣西右布政使戴明說年力富強才識明敏向經降調懲儆諒必洗滌自新爾部傳諭來京遇有京堂缺出補用○遣兵科副理事官張學禮行人

王垓封琉球國世子尙質爲中山王○以李嘉彥爲河南按察使

由陝西河西道副使遷

○己丑諭靖海將軍海澄公鄭成功曰自古識時俊

傑遇推誠待人之主披肝效順矢忠勿二方能建立事功身名俱泰未有猜疑觀望可稱識時知命者朕承 皇天眷佑奄有萬方

海陬一隅何難偏師戡定但閩嶠蒼生皆吾赤子不忍勤兵又念爾父鄭芝龍投誠最早忠順可嘉故推恩延賞封爾公爵給與救

印俾爾駐紮泉漳惠潮四府撥給遊營兵餉養爾部下弁兵朕之  
推誠待爾可謂至矣爾自當薙髮傾心義不再計今據爾疏奏雖  
受敕印尙未薙髮冀望委畀全閩又謬稱用兵屯紮舟山就近支  
給溫台甯紹等處錢糧詞語多乖要求無厭乃復以未撤四府防  
兵爲辭爾尙未歸誠豈有先撤防兵之理若爾懷疑猶豫原無歸  
誠實心當明白陳說順逆兩端一言可決今如遵照所領敕印薙  
髮歸順則已如不歸順爾其熟思審圖毋貽後悔○庚寅贈故國  
史院大學士張端太子太保諡文安廕一子爲中書舍人○甲午  
復設墻子嶺關口以章京筆帖式各二員稽察○戊戌子故一等  
精奇尼哈番固山額眞左夢庚祭諡莊敏○甲辰閩浙總督劉清  
泰以病乞假允之○乙巳以卓羅署吏部尙書由固山額眞署覺羅伊圖  
署刑部尙書由宗人府郭科署工部尙書由侍郎署覺羅阿克善署左

都御史

由梅勒章京署

○戊申免陝西鎮原廣甯二縣被災額賦○丙辰

以屯泰爲兵部尙書兼右副都御史總督閩浙

由吏部右侍郎遷

一作

○丁巳諭禮部朕方在沖齡卽值

先帝晏駕終天抱痛時

刻靡諼夢想音容涕泗橫集自元年定鼎以來綏輯多方焦心勞

思不遑甯晷願瞻 陵寢邈在天涯雖歲時祭祀齋沐遣官而朕

躬未行恭謁追慕之殷以日爲歲每臨餐廢箸中夜以興所以擇

吉東行必不獲已茲復思 太祖 太宗勅造丕基付託朕躬繼

承匪易目今方隅未靖師旅繁興兼之旱澇頻仍小民失所一應

養兵恤民措置規畫朕與諸司夙夜圖維猶虞不給東行往返未

免延曠時日有稽政務欲專心化理則難展至情若亟遂孝思又

慮乖民望再四躊躇我 太祖 太宗原以天下生民爲念如天

下未安無以上慰 太祖 太宗在天之靈朕心亦何能安爲此

今歲停止東行俟他年有暇再行展謁○于死事廣東副將茅生蕙等官

八月戊午朔免陝西延安府荒地額賦○裁戶部十四司主事各一○已未南贛巡撫宜永貴奏官兵會勦瑞金縣逆賊直搗羅漢巖生擒僞都督許勝可等十餘人並賊眾數百人瑞金平命所司察敘○庚申大學士范文程等奏頃者差遣恤刑仰見 皇上愼重刑獄至意但前此議遣滿漢大臣巡方慮有擾民是以停止今四方水旱災傷紛紛見告恐奉差各官仍多煩擾亦應暫請停止其見禁重囚應敕各巡撫詳勘以可矜可疑者奏聞定奪從之○壬戌左都御史龔鼎孳遵旨回奏大學士馮銓尺寸靡效罪過頗多得旨馮銓罪過累經寬宥諡旨甚明若伊尙有隱罪龔鼎孳先宜指參何待責令回奏始引馮銓抵塞甚屬無謂奏內云密勿票

擬不得參糾非如諸曹有事可指既知諸曹可指卽當明言無諱

以抒忠悃○山東濮州陽穀朝城范縣觀城地震有聲○丁卯以

董應魁爲廣東右布政使由福建按察使遷于之士爲山東右布政使由陝

西苑馬寺卿遷○增福建浦城縣楓嶺營以遊擊守備各一員兵一千名

駐紮撤常山廣濟驛移長汀三洲驛爲小關驛移上杭藍屋驛於

浦城爲柘浦驛○庚午諭吏部朕覽江甯巡撫周國佐歷來章奏

詞語模糊意見游移此必事事假手左右胷中漫無主持蘇松重

地豈容闒茸之人因循貽誤周國佐著解任回旗該部作速會推

才品堪任者具奏○辛未初德州生員呂煌以窩逃事覺託拖沙

喇哈番呂獻忠行賄於逃人之主趙五子五子發其事呂煌流徙

獻忠下部議處部議獻忠犯在赦前請貸其罪得旨貪官受贓詔

款不赦獻忠作保行賄既眞何得援赦奏請著令回奏越六日部

臣回奏稽遲復有旨切責於是議獻忠應革職議上 上以兵部

堂司官顯有受賄情弊下諸王大臣議處至是王大臣議部臣將

不應赦之事蒙混援赦又回奏稽遲尙書噶達渾孟明輔侍郎覺

羅科爾昆衛周允張基遠及滿漢司官應各分別降革罰俸得旨

噶達渾著革一箇前程介山革半箇前程各罰俸一年劉斗屈和

尙吳延祚各罰俸一年孟明輔衛周允各降三級調外用張基遠

降二級調外用賈濬革職爲民又以原任督捕侍郎魏瑄條奏逃

人減等明爲呂煌而發及滿官欲參德州知州佟昌年又強行沮

止魏瑄革職流徙盛京○甲戌以張中元爲右僉都御史巡撫江

甯由太僕寺卿遷○諸王大臣議大學士王永吉爲兵部尙書時鞠問窩

逃呂煌行賄一案審結稽遲又不奏參知州誣解窩主且欲坐逃

主以嚇詐之罪應革去大學士降二級調用仍奪俸六箇月得旨

王永吉破格超擢簡任機密當場忠爲國以圖報稱昨諸王大臣會議呂煌一案詰問情由輒張威忿怒全無小心敬慎之意豈非欲效陳名夏故態耶負恩殊深宜加重處姑從寬革去大學士降一級調用罰俸六箇月○乙亥經略大學士洪承疇奏辰常總兵官徐勇當黔寇狡獪之時誓死固守歷有戰功逆賊遣書誘降斬其來使以示無貳後因辰州孤城莫援賊將白文選率眾圍攻城遂陷勇督兵巷戰被槍墮馬猶立斬數賊力竭不支爲賊所害既死猶握刀不釋賊截其手而去闔門遇難者三十九人請加優卹以勵臣節得旨徐勇屢著戰功忠節殉難闔門受害深可憫惻著所司從優察卹又奏辰常道參議劉昇祚辰州城陷被執賊偏授僞職辱罵不屈立遭慘磔闔門男婦遭戮無遺辰州府知府王任杞城陷後罵賊觸怒碎屍而死其祖母俱自縊一門男婦遇害者



四十六人並請褒卹得旨劉昇祚等應得卹典該部察例具奏○

丙子調張秉貞爲兵部尙書由刑部調李呈祥爲兵部左侍郎由督

轉郎以黃徽允爲兵部右侍郎由太僕寺卿遷○戊寅降順天巡撫王來用

一級調用以其咨奏稽遲也○庚辰以傅以漸爲內翰林祕書院

大學士由國史院學士遷任濟爲刑部尙書由倉場侍郎遷梁清遠爲兵部督捕

右侍郎由大理寺卿遷○以原任左都御史趙開心爲太僕寺卿○壬午

故明樂安王朱議潮及僧人文秀道士張應和等謀逆事覺伏誅

○癸未諭吏部朕惟旌賢勸能國有常典大學士范文程額色黑

甯完我尙書郎球巴哈納車克侍郎祝世允向在 太宗時素效

忠勤歷今始終不渝或匡贊政機勞深啟沃或經理部務力殫猷

爲成績已彰宜加恩晉秩范文程著加少保兼太子太保額色黑

車克甯完我郎球巴哈納祝世允俱著加太子太保各照舊辦事

議政大臣巴哈篇古囊在 太宗時宣勞有素近復左右朕躬勤勞罔替益罄忠誠並宜加秩示勸巴哈篇古俱著加太子太保○甲申諸王大臣議覆隱匿逃人例得旨王等議隱匿逃人之家給與逃主爲奴朕思儻有好惡之徒圖財設局以害無辜如從前正法之小羽子等亦不可測宜詳慎定議其地方兩鄰僉解流徙之例因一罪犯牽連眾人蕩家廢產遠徙他方朕心不忍且所議大小官員等罪亦屬太過著一併另議具奏○贈太子太保左都御史房可壯少保子祭葬廕一子入監讀書○丙戌裁湖廣隨州所歸併安陸衛枝江遠安彝陵長甯所歸併荊州衛桂陽所歸併郴州衛常甯所歸併衡州衛東安所歸併永州衛

九月己丑 上幸內院召諸王及九卿科道等漢官賜茶畢因語及巡撫宜永貴奏稱滿洲逃人甚多捕獲甚少而漢官議隱匿逃

人之罪必欲輕減一事諭諸漢臣曰朕荷天眷撫有鴻業無分滿漢概加恩遇於漢人尤所體恤乃爾等每與滿洲牴牾不克和衷是何意也當明末北人南人各爲黨與致傾國祚朕儻有偏念自當庇護滿洲今愛養爾等過於滿洲是朕以一體相視而爾等蓄有二心朕以故舊相遇而爾等猜如新讖朕以同德相期而爾等多懷異念矣朕從來不念舊惡爾等自太祖太宗以來本爲敵國朕荷天佑撫有大業海宇之內皆我臣庶自應捐除旣往悉子恩施但爾等遭流賊之禍如蹈水火朕救援而安養之爾等誠念及此豈可不圖報效今爾等之意欲滿洲家人盡皆逃亡使滿洲失其所業可乎朕姑宥前罪嗣後其各改心易慮爲國爲君盡忠效力以圖報稱朕優念爾等故面諭及此若更持貳志行私自便爾時事發決不爾貸諸漢臣奏曰皇上諭及此臣等有何置

辯從此以後惟改心易慮各盡職守耳○諭吏部少保兼太子太  
保祕書院大學士范文程自 太宗時委用辦事二十餘年忠誠  
練達不避艱辛朕所倚賴乃近以積勞成病雖暫假調理心仍夙  
夜在公未得喘事藥餌旦夕奏效深繫朕懷可暫令解任謝事安  
心調攝特加升太傅兼太子太師昭朕眷體大臣至意佇俟病痊  
以需召用○以田起龍爲福建按察使由山東青登萊道遷○予假原任右  
都御史趙繼鼎以年老乞休允之○庚寅以軍功封廣西提督線  
國安爲三等伯授三等阿思哈尼哈番右翼總兵官全節爲三等  
精奇尼哈番一等阿達哈哈番又一拖沙喇哈番左翼總兵官馬  
雄爲二等阿思哈尼哈番仍鎮守廣西○以白色純爲吏部右侍  
郎由學士遷○降原任兵部侍郎杜立德一級調用以前審高逃呂煌  
行賄一案不卽完結又不糾參德州知州佟昌年徇庇也○壬辰

諭吏部督撫責任封疆關繫非輕員缺未可久懸王來用奉旨降  
調已經十三日何得至今尙未推補殊屬怠忽著卽會推堪任者  
具奏以後似此等緊要員缺須於命下次日卽行會推毋得仍前  
遲延取罪○申嚴隱匿逃人之禁○以王永吉爲倉場侍郎○癸  
巳免直隸宣府萬全右衛被災額賦○乙未倉場侍郎王永吉具  
奏謝恩諭曰王永吉初擢內院時曾有感恩圖報等語乃行不顧  
言以致獲罪人臣果有爲君爲國實心當見諸實事似此空言何  
用仍命通行申飭○丙申以董天機爲右副都御史巡撫直隸

南布政

○丁未江南江西總督馬國柱以衰老休致○庚戌改江

江北提督學院爲提學道○辛亥降漕運總督沈文奎三級調  
用以督催漕運稽遲也○壬子諭吏兵二部朕見往代有五軍都  
督府衙門我朝未曾設立爾二部傳知議政王貝勒大臣會同九

卿詹事科道等官詳究往代設立之意確議應否踵行具奏尋議

往代設立五軍都督府衙門蓋欲文武官員相對理應設立但今

歲糧餉缺乏修造衙署及各官祿俸所需實繁應暫停止從容議

設報可○以馮聖兆爲右副都御史巡撫延綏原任偏沅巡撫○轉衛周

祚爲吏部左侍郎調梁清標爲吏部右侍郎由禮部調

冬十月庚申添鈔關滿官各一○壬戌達賴喇嘛厄魯特願實汗

等來貢○乙丑議從敬謹親王征湖南敗績諸臣罪貝勒屯齊巴

思漢貝子扎喀納穆爾祜革爵撤所屬人員固山額真公宗室韓

岱削職籍其家降爲庶人餘降革有差○辛未大學士甯完我進

故明洪武大誥三冊命內院諸臣翻譯進覽○免江南廬鳳淮揚

四府徐滁和三府被災額賦○癸酉經略大學士洪承疇以廣西

撫臣陳維新疾篤請解任得旨廣西要地一日不可乏人著速推

堪任之員具奏○丁丑諭禮部定南武壯王孔有德審時率眾航海來歸屢建功績迨朕平定天下有德勦巨寇靖南服開闢廣西勦勞懋著不意桂林之役眾寡不敵精忠自矢竟以身殉義烈允彰稽考舊典有立祠致祭之例爾部其詳察具奏尋建有德祠以二妃陪祀俱設神主春秋致祭○諭刑部朕思重囚犯罪法固難宥但其中萬一冤枉死者不可復生人命至重恐違上天好生之心自今以後三法司照常覈擬進奏復批議政王貝勒大臣詳確擬議以憑定奪施行○己卯諭禮部內府事務殷繁須各司分理乃止設十三衙門其原設之尙方司未曾議及此司係 太宗時設立職掌甚要斷不可少著仍舊設立共爲十四衙門○壬午賑畿輔被水州縣○平南王尙可喜靖南王耿繼茂奏逆賊李定國猝陷高明復圍新會賊勢張熾兵力不支請速發禁旅以靖邊圉

奏下兵部○癸未厄魯特部來貢

十一月丁亥朔以陳泰爲吏部尙書

由國山額真遷

胡沙爲工部侍郎

由

勅章京遷

○平南王尙可喜遣子之信入侍○辛卯以沙濟達喇爲理

藩院尙書

由侍郎遷

○壬辰贈死事萊州道副使徐大用等官○乙未

增鑾儀衛冠軍使二雲麾使四治儀正二十一整儀尉十三○己

亥以張尙爲福建右布政使

由山西按察使遷

董應徵爲山西右布政使

由冀甯道參政遷

○庚子鑲黃旗同安侯鄭芝龍奏逆子成功請地益餉

抗不雍髮寄臣書信語多違悖妄誕無忌臣不敢隱匿謹將原信

二封繳呈 聖覽臣當席禁待罪得旨議政王貝勒大臣會同密

議速奏○壬寅詔曰朕纘承 祖宗鴻緒統馭天下十有一年治

效未臻民生未遂疆圉多故徵調甚繁水旱屢見地震屢聞皆朕

不德所致也朕以眇躬託於王公臣庶之上政教不修補救無術



而內外章奏文移動輒稱聖是重朕之不德也自今以往朕深加修省大小臣工亦宜恪恭職業共弭災變保乂黎元凡章奏文移不得稱聖大赦天下咸與更始官民人等其務體朕意○癸卯

上幸南苑○甲辰靖南王耿繼茂遣子精忠昭忠入侍○議政王

貝勒大臣會議鄭成功屢經寬宥遣官招撫並無雍髮投誠之意

且寄伊父芝龍家書語詞悖妄肆無忌憚不降之心已決請敕該

督撫鎮整頓軍營固守汛界勿令逆眾登岸騷擾生民遇有乘間

上岸者即時發兵撲剿從之○丁未贈殉難二等阿思哈尼哈番

辰常總兵官徐勇爲太子太傅一等阿思哈尼哈番○己酉禮部

左侍郎呂崇烈以衰老致仕○庚戌以余應魁爲江南按察使由

廣督糧道李起龍爲山西按察使由陝西督糧陳喆爲浙江按察

使由山西冀甯○甲寅原任南贛巡撫劉武元卒○丙辰戶部奏

參政遷

道參政遷

故明舊例各直省人丁或三年或五年查明造冊謂之編審每十年又將見在丁地彙造黃冊進呈我朝定鼎以來尙未舉行今議自順治十二年爲始各省責成於布政使司直隸責成於各道凡故絕者開除壯丁脫漏及幼丁長成者增補其新舊流民俱編入冊年久者與土著一體當差新來者五年當差至於各直省地土凡辦錢糧者爲民地不納錢糧者不分有主無主俱爲官地各邊鎮俱應照例分別其荒田曠土招民開墾一如興屯之法畿內滿漢錯雜之處難於清查如有隱地漏糧許人告發從之

十二月丁巳朔轉薛所蘊爲禮部左侍郎以胡兆龍爲禮部右侍

郎由學士遷

○戊午轉彭有義爲山西左布政使由陝西右布政使轉張鳳儀爲

湖廣左布政使

由右布政使遷

○庚申以長史濟世爲議政大臣○以尼

堪爲理藩院侍郎

由大理寺卿遷

○漕運總督沈文奎奏叛首朱周鉉糾

眾煽惑稱僞軍門及僞東平王名號爲事內人所首被擒正法並  
獲叛黨陳德等○先是廣西巡撫王一品告病回旗病愈復推補  
廣西一品以遠缺圖規避貽屬吏科給事中陳嘉猷代題未果上  
事覺交部至是部議王一品應絞陳嘉猷流徙甯古塔從之○辛  
酉和碩承澤親王碩塞薨年二十七○癸亥子告弘文院大學士  
高爾儼卒○戊辰免湖北荆門鍾祥等六州縣被水額賦○己巳  
增刑部滿洲副理事官四漢軍副理事官二○免河南祥符等三  
十六州縣被水額賦○壬申命世子濟度爲定遠大將軍貝勒巴  
爾處渾貝子吳達海固山額眞噶達渾帥師征鄭成功○以徐永  
楨爲陝西右布政使由四川按察使遷張爾素爲湖廣右布政使由陝西按察使遷  
○初大學士呂宮引病乞休奏內有腎氣虛寒人道俱絕等語  
御史姜圖南劾其言詞穢褻失奏對體宮再奏乞休自稱德薄望

輕致人慢侮語侵圖南圖南復劾其居心儉險怙過噬人 上念  
宮病不問○平南王尙可喜靖南王耿繼茂奏逆賊李定國圍犯  
新會城中糧盡殺人馬爲食臣等率兵往援至三水縣分布沿江  
隘口出奇兵制其後以待大軍比靖南將軍朱瑪喇等至遂合兵  
進勦敗之於珊瑚洲戮僞副將一生擒十餘名斬級百五十餘抵新  
會定國率馬步賊分據山口山頭我軍奮勇衝擊奪其山斬獲甚  
眾定國遁新會以全命所司察敘○乙亥福建巡撫佟國器奏海  
逆鄭成功襲入漳州連陷各縣復圍泉州勢及興化請迅發滿洲  
大軍進勦並敕調潮州水師直抵廈門與閩師首尾夾擊下議政  
王貝勒大臣會議○丁丑敕諭朝鮮國王李滉曰前因李敬輿李  
景奭趙綱等情罪重大旣奉 太宗皇帝諭旨勒令革職不用爾  
乃復表其忠勤朦朧懇請據稱與古爾馬洪李馨長有誓互相締

結乘時構毀是以亂政之愼王爲可用矣以亂政之愼王爲可用  
其如 太宗皇帝之諭旨何如爾父數十年之恪守侯度何似此  
庇奸啟亂朕甚爲爾懼焉故遣使特諭使爾力加省改今覽爾奏  
有當時錯糾妄奏莫非舉國君臣迷罔愚昧之所致等語夫爾爲  
一國之主果有啟亂愼王卽當顯行糾舉豈可以空言塞責但念  
爾痛悔前愆言辭懇切旣與舉國臣民誓心糜隕益殫誠恪以報  
我朝玉成之至德認罪已明姑從寬宥自今以後凡有陳奏當一  
出於真誠乃爲可長可久之道斷不可輕信愼王致生事端以負  
朕撫字小邦之意爾其欽哉毋怠○命固山額眞明安達禮統兵  
征羅刹於黑龍江○封朝鮮國王李湜子櫛爲世子○以平南王  
尙可喜靖南王耿繼茂賑恤粵東饑民賜以銀幣仍降敕獎諭○  
免陝西西安五衛荒地額賦○經略大學士洪承疇奏湖南衡州

長沙常德三府火災異常延燒兵民房屋萬六千餘間 上命督  
率文武各官切加修省以弭天變○江西巡撫蔡士英奏逆寇周  
立發構難閩中流禍江界偽總兵霍武等相爲犄角福建江浙三  
省附近居民被其殘害分守湖東道安煥令守備陳天珍等勦撫  
並用霍武等率眾來降湖廣東路悉平○是歲人丁戶口一千四  
百五萬七千二百有五田地山蕩三百八十九萬六千九百三十  
五頃畦地二萬二千九百八十箇徵銀二千一百六十八萬五千  
五百三十四兩九錢米麥豆五百七十七萬五千一百八十九石  
有奇草五百一十六萬四千六百五十一束行鹽三百九十八萬  
六千八百五十八引徵課銀二百一十八萬六千三百六十九兩  
五錢鑄釐錢二十四萬八千八百五十四萬四千四百六十有奇  
舊鑄銅錢二十萬一千二百一十有奇鈔一十二萬八千一百七

十二貫四百七十有奇

東華錄

順治二十四

臣王先謙敬編

臣周澹蕃恭校

順治十二年乙未春正月丙戌朔朝鮮來貢○戊子兩廣總督李率奏廣西土賊偽總兵廖篤增等負嶠作梗結連西逆官兵分道進剿陣斬篤增於玉版巢又賊渠李先芳廖鳳等盤踞藤縣遙爲李定國聲援定藩左翼總兵官馬雄攻之生擒偽知府姜炎斬獲無算下兵部察敘○庚寅免山東東平濟陽等十八州縣去年被水額賦○多羅貝勒巴爾處渾薨諡和惠○癸巳以祖重光爲陝西按察使由江西湖西道參政遷高士俊爲四川按察使由河南大梁道參政遷○乙未免直隸八府及河南彰德衛輝懷慶去年被水額賦○戊戌諭諸王大臣等昔皇考上賓朕方六歲正在幼冲當時諸王大



臣同心推戴嗣紹丕基及定鼎京師奄有四海於時睿王攝政朕  
惟拱手以承祭祀凡天下國家之事朕既不預亦未有向朕詳陳  
者故於滿兵之艱辛人民之疾苦原未周知自朕親政以來五年  
於茲焦心勞思以求化理夙夜祗懼不敢荒甯日望諸王大臣以  
嘉謨嘉猷入告匡救其失而輔其不逮乃疆圉未靖水旱頻仍吏  
治情汚民生憔悴錢糧侵欠兵食不充教化未孚綱紀不立保邦  
致治之道迄今未得其要領朕思諸王大臣皆親見 太祖 太  
宗勅業垂統之艱難年來闕地綏民之不易必有長策以裨治安  
而未見有直言得失者豈朕聽之不聰而虛懷納諫有未盡歟何  
相率而默默也以天下之大機務之繁責於一人而弗圖勸翼朕  
雖涼德獨不念 太祖 太宗培養之恩乎揆厥存心或以爲奉  
命議事止宜將順而行否則緘口容身可保富貴試熟思之天下

未平富貴能長保乎以後凡養兵愛民興利除害有關政治者居則深思進則敷奏各抒忠盡以慰朕懷至於當事諸臣因循積弊僅以簿書爲務不肯精思職掌擔大事發正言以圖實濟國計民生將何賴焉內外大小各官專爲身謀罔念官守容容充位望缺希遷祿秩是營恩怨不化真心爲國殆鮮其人前御史吳達謂滿朝大小各官盡皆臃腫朕以爲出言太過由今觀之似不誣矣茲復開誠切諭務痛加省改有官守者必盡其職有言責者必盡其言弼德塞違期臻郅治君臣上下俱有令聞豈不美哉○封豫郡王多鐸次子察尼爲貝勒○吏部議覆給事中朱徽奏吏部司官一年內升一人外轉一人科員一年內升二人外轉二人御史二一年內升三人外轉三人司道除升巡撫外每年亦內升三人其司道內升滿洲不論科目漢人仍以科目出身爲限必查其曾舉卓

異俸薦俱優者方准內升此外若又有缺出則以在京衙門應升之人補用從之○己亥諭滿洲武弁兵丁等朕以涼德藐躬纘承祖宗鴻業十有二年矣睿王時朕年沖幼未預政務爾等將士艱難疾苦無由悉知自親政以來五年於茲各官竟未有以爾等疾苦入告者意爾等居官者自有俸祿充伍者自有月餉足以贍養耳近聞生計蕭條僕逃馬斃而又各處征勦整理器械久在行間不得安處且年來水旱頻仍秋成莫望無以聊生此皆朕不德所致也睿王時爾等心期口誦望朕於何日親政又安天下共享太平豈料竟虛所望言念及此夙夜焦思寢食俱廢矣嗟爾將士等披堅執銳露宿風餐汗馬血戰出百死一生以開拓天下勞苦如斯朕豈忍復靳恩賞有稽卹賚但今封疆未靖需用繁多百姓未甯錢糧逋額是以朕懷莫慰朕爲天下之主於爾等將士竟未

加惠而爾等仍勵初心爲國效力此皆追念 太祖 太宗育養

深恩而報之於朕也爾等如此盡心朕豈時刻有忘稍俟豐足卽沛恩施爾等其各知朕意○辛丑諭吏部朕惟賢才難得政事需人必舍短以取長宜計功而忘過特頒恩命圖任舊臣原任吏部尙書韓岱原任固山額眞伊爾德阿喇善等俱從 太祖 太宗

時效力或膺部伍勤劬或佐戎行勞苦若以一眚終錮朕心不忍茲特復其原任韓岱爲吏部尙書伊爾德阿喇善爲固山額眞赦過宥罪旣宏施雨露之恩盡職奉公宜益勵冰霜之操尙其永念勿負朕心○壬寅命考選軍政照文官例卓異者賜服旌勳○癸卯以于時躍爲右僉都御史巡撫廣西

由湖廣驛傳道副使遷

○甲辰諭吏

部等衙門人君圖治當虛己以求言臣子效忠必有猷而入告年來水旱相仍干戈未息滿洲兵丁困苦至極飢寒百姓轉徙死亡

雖朕之涼德實因臣下政事不修兵民失業弭救無策致此多艱  
在京七品以上文武滿漢官員俱宜殫竭忠誠共圖補救凡職掌  
所屬向來積弊之處見今整頓之方詳切敷陳以資採用知其病  
卽備其藥言其害卽舉其利其務各抒所見毋得浮泛空言雷同  
塞責負朕求言至意如兵民疾苦拯救事宜果有確見良籌雖非  
職掌亦許另疏具奏○諭吏部朕撫育萬方夙夜祗懼講求愛民  
之道不啻三令五申乃年來水旱相仍干戈未靖民窮莫拯兵食  
不充上德弗宣下情壅塞所以致此弊非一端朕已廣開言路博  
詢化理復念天下至大民情土俗所在不同地方各官身親實歷  
凡兵民疾苦政事利弊必皆灼知於心耳聞目見最爲真切今文  
官自督撫以下知府以上武官自提鎮總兵官以下副將以上管  
轄之內職掌事宜向來積弊何以得清見今整頓如何而可俱著

詳切直陳無隱以資採用司道知府副將著各陳奏一次以副朕  
周諮勤民至意○諭吏部都察院及科道官員曰三年以來水旱  
相仍干戈未息飢窘人民轉徙溝壑滿洲兵士困苦無聊災變未  
弭時艱莫救其故安在意者朕躬之有闕用人之不當行政之失  
宜以致是歎抑諸王貝勒大臣或有勳翼未盡而然歎前曾有旨  
命言官直陳時事無論當否概予優容後乃分別是非間生譴謫  
致生疑畏之心章奏敷陳未免瞻顧兵民疾苦不得上聞今廣開  
言路博詢化理凡事關朕躬者何令不信何政未修諸王貝勒辦  
事諸臣曠職之愆叢弊之處及內外各司何害未除何利未興各  
據見聞極言無隱須詳明切實庶便覽觀一切啟迪朕躬匡扶國  
政者所言果是卽與採用如有未當必不加罪毋得浮泛塞責負  
朕求言至意○諭吏部朕有天下皆我太祖太宗積德施仁

開初鴻緒以貽藐躬朕既爲生民主一夫不獲時廬朕衷念自明  
運式微流賊煽亂朕奉天承命救民於水火之中率土人民如  
依父母以爲必蒙愛育得享昇平豈意比年以來水旱頻仍干戈  
未靖轉輸旁午人不聊生蕩析離居鬻及妻子煢煢無告展轉呼  
號想其怨咨必歸於朕言念及此何以仰副祖宗付託之意中  
夜以興潛焉出涕雖未能減賦蠲租實欲除苛去甚與良有司其  
圖休養已有諭旨令內外大小官員悉心條奏通達下情自今以  
後各地方錢糧凡橫斂私徵暗加火耗荒田逃戶灑派包賠非時  
豫徵獨免不實災傷遲報踏勘騷擾妄興詞訟妨奪農時等弊一  
切嚴行禁革有違犯者該督撫卽行糾參以憑重處如督撫徇情  
庇縱部院科道官訪實劾奏○丙午御製資政要覽親爲序  
曰朕惟帝王爲政賢哲修身莫不本於德而成於學如大匠以規

矩而定方圓樂師以六律而正五音凡古人嘉言善行載於典籍者皆修己治人之方可施於今者也朕孜孜圖治學於古訓覽四書五經通鑑等編得其梗概推之十三經二十一史及諸子之不悖於聖經者莫不蘊涵事理成一家言但卷帙浩繁若以之教人恐未能一時盡解其義亦未能一時盡得其書因思夫記事宜提其要纂言當鉤其元乃採集諸書中之關於政事者爲三十篇又慮其渙而無統於是每篇貫以大義聯其文詞於忠臣孝子賢人廉吏畧舉事迹其奸貪不肖悖亂者亦載其內使法戒炯然加之訓詁詳其證據譬之萃眾白以爲裘范六金而成鼎旨約而易明文簡而易閱名曰資政要覽觀是書者熟思而體之可以爲篤信之善人推類而廣之可以爲明理之君子毋徒求之語言文字之間則朕諄諄教諭之心庶乎其不虛矣○左都御史屠賴等奏愛



民莫先除害近聞八旗投充之人自帶本身田產外又任意私添或指鄰近之地據爲己業或連他人之產隱避差徭被占之民既難控訴國課亦爲虧減上下交困莫此爲甚宜敕戶部將投充之人照原投部檔查覈給地外其多占地畝卽退還原主庶民累稱甦租賦亦增又年來因逃人眾多立法不得不嚴但逃人三次始絞窩主一次卽斬又將鄰右流徙非法之平竊謂逃人如有窩主者逃人處死卽將窩主家產人口斷給逃人之主兩鄰甲長責懲該管官員議處無主者仍鞭一百給主其自投歸主及窩主首出者俱照例免議庶逃人少而無辜之株連者亦少再如建言降革諸科道已蒙特旨令吏部開列事由奏請查降調禮部郎中郭一鵬流徙詞臣李呈祥侍郎魏琯等其罪雖分輕重實皆由於進言似應一體開列以候 睿裁庶不虛宥過惜才之盛典得旨著議

政王貝勒大臣九卿詹事科道等官會議具奏○丁未鎮國公巴

布泰卒諡恪僖○命胡兆龍以侍郎銜仍在內院辦事以李爽棠

爲禮部右侍郎

由國史院學士遷

○庚戌

御製勸善要言成

親爲序

曰朕惟天道至善卽以其善賦之下民故人之生無有不善其或有不善者皆因內蔽於私欲外染於污習遂失其繼善成性之本而日遠於天矣人之存心行事不同是以上天鑒察降以災祥其降祥者固以顯佑善人其不得已而降災者亦以明戒下民使之改過而遷於善也從來報應昭昭不爽詎不可畏哉古人原天垂訓以教天下正論嘉言不一而足但文之深者或不易通言之簡者又不能盡朕恭承天命撫育萬方深念上之教世勸善爲先人之立身爲善最樂故取諸書之要者輯爲一編名曰勸善要言語不欲文期於明理詞不厭詳期於曉眾欲使賢愚同喻小大共

知讀此書者當深思其義反之於心體之於身善者則益當加勉而進於清良以求吉慶其或無知而誤染於不善者尤當速改而歸於無過以免災戾庶幾不負上天好生之心而朕殷殷教化之意亦不虛矣凡我人民其敬勉之哉○辛亥諭大學士額色黑等朕惟平治天下莫大乎教化之廣宣鼓動人心莫先於觀摩之有象夫精微之道難喻頡蒙而質樸之言未詳證據茲欲將歷代經史所載凡忠臣義士孝子順孫賢臣廉吏貞婦烈女及奸貪鄙詐愚不肖等分別門類勒成一書以彰法戒名之曰順治大訓卽於新春開館特命額色黑金之俊呂宮爲總裁官能圖張懸錫李蔚爲副總裁官卿等受茲委任須協力同心殫思博採務令臣民皆可誦習觀感興起無負朕惓惓化導之意○壬子諭內外文武官員等朕每思與朕共理天下者惟爾內外文武諸臣是賴已有諭

旨自朕躬闕失以及政事未當之處俱令各官悉心條奏採擇施行茲以朕思慮所及先頒敕諭著令該管衙門作速遵奉興利除害稱朕祇承天意周恤民隱至懷一知府乃吏治之本若盡得其人天下何患不治今各處知府百有餘員其最要者如直隸之眞保河間江南之江甯淮揚蘇松常鎮浙江之杭嘉湖紹山東之濟南青兗山西之太原平陽河南之開封彰德陝西之西安延安江西之南昌吉安湖廣之武昌荆襄福建之福州泉州共三十府或政事殷繁或地方扼要知府之任尤宜得人如不得其人致被參劾迎送勞擾公務廢弛交代之際吏胥作奸爲害甚大與其參之於後莫若慎之於先著在京各衙門滿漢堂官三品以上及在外督撫各舉才行兼優堪任知府者一人詳開履歷事蹟具奏吏部再加察議奏請定奪以備前三十處知府之用如遇缺出仍開

列正陪候旨點用其餘各府且照近例行有薦舉徇私及推諉不薦者議處湖南四川兩廣等處用兵地方聽該督撫選擇題用一  
歷代州縣之制自漢以來皆以人戶分大小隋有開劇衝要之等  
唐有赤畿望緊之差明時因之酌爲繁簡定有成例隨才器使各  
盡其用今籤掣未嘗不公但精明強幹者或置於簡僻無可展布  
而劇要地方或以付衰弱之人致公事廢弛錢糧侵欠雖加罪責  
事已莫追著吏部詳察舊例參酌時宜將地方分爲三等具疏奏  
奪應選官員考其身言書判精加揀擇亦分三等具奏上等者列  
名引見候朕面定方將上等之缺從公掣籤其考居二等者授二  
等地方三等者授三等地方不必引見俱從公掣籤務使州縣各  
官人地相稱一水旱災荒古今代有全在豫備得法一省報荒必  
有不荒之府一府報荒必有不荒之縣荒者當速賑不荒者卽當

早備如常平倉之法米賤則增價以糴米貴則減價以糴官民俱便歷代行之未嘗有改明宣德年間巡撫周忱與蘇州知府況鐘多方儲積蘇州一府至六十餘萬石松常二府尙不與焉春夏濟農秋冬還官民至今稱之若各地方官果有爲國爲民之心豈不能於存畱項下周詳設處著戶部嚴飭遵行一賦役原有定額自流賊煽亂之後人丁逃散地畝荒蕪奸民乘機透漏良善株累包賠或有田而無糧或有糧而無地或有丁而無差或有差而無丁甘苦不均病民殊甚著各布政使嚴飭該道府責令州縣官查照舊冊著落里甲逐一清釐隱漏者自首免罪包賠者准其控告查確卽與豁免不許藉端擾害事畢造冊報部以憑覆覈卽以查出多寡分別各官殿最至於屯道屯廳奪民熟田捏充開荒及墾少報多令民包納者一體清查俾無重納以寬民力其河東長蘆等

處各運司鹽課原應商人辦納中有每年派民納課而民不見升  
合之鹽者著該運司詳加稽覈從長計議務令公私兩便經久可  
行毋得因循積弊一有司賢否全憑督撫舉劾而督撫又寄耳目  
於司道府推層層開報原期詳覈近乃上下扶同以餽遺之厚薄  
情面之大小顛倒貪廉俾循良不獲上達奸婪反腐優考勸懲不  
公吏治因之大壞以後實令司道府推一應官評務要細開事蹟  
轉報督撫逐件確覈如開報不實卽先指名奏參至督撫薦語據  
事直陳不得仍襲浮辭故套如止憑開報不親自體訪覈實以致  
賢否混淆事發一體究治一設立學校原以養育人才爲將來治  
民之用著各提學官查照舊制優獎德行有敗羣不檢者確訪黜  
懲分別優劣務要公嚴有司教官不得徇情通賄濫舉優行私疊  
讐誣捏送劣行向來情弊每有不肖之尤自知公論共棄畏罪鑽

營濫膺優舉或有原非甚劣偶因別事觸犯官吏遂挾恨主使以不檢開送尤爲可恨俱著嚴行飭禁違者事發治罪一瀕河郡縣田土盡湮各地方協濟河工一束之草賠銀數錢徵調繁興侵那萬狀河夫工食不能時給物力已竭續用未成中原重地人民苦累半由於此自今以後該管各官務宜親駐河干解到人夫物料嚴覈數目乘時修築工食價值毋得短減有仍前作弊者從嚴題參立即拏究期在早竣以蘇民困一近來各處驛遞疲累至極衝要地方尤爲苦困皆因馬價草料工食等銀不敷支用民力既窮馬亦隨斃買補之費仍出於民困如此勢必至驛政盡壞道路不通著戶兵二部行各督撫察地方衝僻及路程遠近每驛應用馬匹草豆鞍轡夫役工食數目錢糧見額若干應補若干逐一確算造冊奏報應用錢糧准於應解正項錢糧內動支原解缺額該



部另行酌議務期久遠可行凡從前倒塌驛站責令各地方官速行料理如因仍廢弛著該督撫查明並道府題參究治其奉差員役需索騷擾屢有嚴禁著再行申飭務革積弊一各處兵丁日見窮苦皆因督撫鎮道不能潔己釐弊將領餽送悉出兵身所領月糧得不償失深可痛恨著嚴行禁革應支月糧務須依期給發不許官吏需索使費將領借端侵扣違者重究一大軍養馬及駐兵地方應支糧米草豆雖動正項錢糧而運送腳價及各項器用所費不貲悉係民間備辦最爲苦累著該督撫詳察報部酌量銷算其有好貪官吏指稱供應大軍分外多派用一科十折斂入己者嚴察劾奏治以重罪一直省地方重大獄情沈積甚多每處不下數百起皆因逐件具題且疏內所載招詞批駁之語重複繁冗不便覽觀人命至重有罪者尙宜哀矜無干者豈宜淹禁似此奏讞

雖復延引歲時安能完結或致無辜赤子畢命囹圄深爲憐憫已  
經科臣查照會典奏陳著三法司作速詳議覆行以上事條內外  
文武衙門作速遵行係在外者該部騰發各總督巡撫將行過緣  
由逐款奏繳不許視爲具文疏忽遷延自干憲典○乙卯以戴明  
說爲刑部右侍郎

由廣西右  
布政使遷

二月丁巳刑部尙書任潛以衰老致仕○戊午少保大學士党崇  
雅引年乞休允之加太保兼太子太傅馳驛回籍○調劉昌爲刑  
部尙書以李際期爲工部尙書

由刑部左  
侍郎遷

○庚申宗人府府丞原

毓宗奏請復御史巡按直省命鄭親王等會議尋議應令吏部都  
察院會同考選各部院理事官郎中以下才品兼優者巡歷直省  
回京之日聽都察院考覈稱職者升用溺職者重懲報可○辛酉  
加巴哈篇古甯完我額色黑車克巴哈納郎球少保兼太子太保

韓岱哈世屯圖海成克鞏蔣赫德傅以漸呂宮太子太保○給事  
中朱之弼奏朝章國是六部攸司今日諸臣所言之利弊皆六部  
所當興革之利弊也六部自廢其職掌致令言官言之又不能實  
行其所言雖紛紛何益也國家章程燦然備具六部之事各有成  
書儻部臣實心任事凡職掌內當興之利當革之弊自知之而自  
興之革之言官不過拾遺補闕而已六部之事言官不勝言且未  
有職掌內明明當行之事必待人言而後行況言之而又護短匿  
非不肯盡行乎今日之病在六部六部之病在尙書尙書之病在  
推諉推諉之病在皇上不擇人不久任不責成效不定賞罰卽  
使任事之人視國事如家事猶恐廢弛今則盡如事外之人疑事  
畏事之念多任勞任怨之意少事稍重大則請會議不則遷延日  
月諉之行查而已不則卸擔於人聽督撫參劾而已不則畏首畏

尾聽科道指名而已不則苟且塞責無容再議而已上下推諉以

爲固然曾有擔大事發正言以圖實濟者乎伏祈 皇上面召諸

臣親視才品因能授任再考其歷事之後興利幾何除弊幾何視

成效多少以定功罪而行賞罰法在必行無少姑息如此則人知

勸懲而樂於任事矣得旨六部推諉不肯實心任事致被言官如

此陳奏自後務必整肅一新不得仍前怠忽○壬戌大學士呂宮

引疾三疏請告命以太子太保解任調理病痊候旨召用仍賜衣

服鞍馬馳驛回籍○癸亥免直隸成安等六縣去年被災額賦○

甲子戶部右侍郎郝傑以疾請假允之○己巳以歲饑賑八旗窮

丁○庚午轉戴明說爲刑部左侍郎以袁懋功爲刑部右侍郎由通

政使由太僕寺卿遷以趙開心爲戶部右侍郎由太僕寺卿遷○辛未復差御史巡理鹽

政○壬申贈死事桂陽州知州吳廷詔等官○乙亥大學士馮銓

以母喪乞守制得旨院務殷繁需人贊理著令私居持服仍入直

辦事○丙子封皇弟博穆博果爾爲和碩襄親王○免山東濱甯

陽等二十一州縣去年被水額賦○庚辰以陳之遴爲內翰林弘

文院大學士

由戶部  
尚書遷

王永吉爲內翰林國史院大學士

由倉場  
侍郎遷

○

多羅貝勒杜爾祜薨諡愨厚○癸未靖南王耿繼茂平南王尙可

喜奏逆賊李定國自新會敗逃臣等遣梅勒章京畢力克圖等追

擊賊兵於興業縣境敗之又追至橫州江擊其步騎兵勦殺甚多

獲象二隻定國渡江引去竄入南甯府粵東高雷廉等三府三州

十八縣及粵西橫州等二州四縣悉平下部察敘

三月丙戌喀爾喀部丹津喇嘛車臣汗等來貢○丁亥諭吏部等

衙門朕屢經降諭求言止因兵民疾苦積弊叢生內外大小諸臣

必有嘉言良策可佐治平是用廣諮羣議聿備採擇浮泛雷同切

戒勿進近覽章奏求其整頓補救之方詳明切實者寥寥無幾大率勦襲舊言虛應職掌甚至私心報怨阻撓成法風影妄談揣摩生事既無關於政務又罔益於兵民甚負朕虛懷求言至意自今以後凡有敷陳必實切國家之大政確指兵民之利害方許進奏毋得浮泛雷同妄行瀆奏兩部卽傳諭嚴飭行○大學士党崇雅將回籍謁上於南苑上賜衣帽鞞鞞論曰卿今辭朕歸籍不能復見朕矣抵里後服朕賜衣卽如見朕崇雅泣下奏曰臣因年老不能效力於皇上引例辭歸念此衰朽餘生有何報效復蒙皇上破格優待加以寵錫臣更何言臣老矣生既不能圖報惟銜結聖恩於地下耳上命坐賜茶飯仍諭臨行時再行陞見○戊子以戴明說爲戶部尙書由刑部左侍郎遷○初戶部右侍郎趙開心以饑民流離可憫請暫寬逃人之禁以靖擾累以救民命奉旨

逃人甚多緝獲甚少何策而令不累民又能速獲逃人著令回奏至是開心奏嚴逃人者一定之法救流民者權宜之計聞近畿流民載道地方有司懼逃人法嚴不敢容留勢必聽其轉徙若將逃人解督捕衙門暫寬其隱匿之罪以免株連則有司樂於緝逃卽流民亦樂於舉發而逃人無不獲矣得旨逃人之多因有窩逃之人故立法不得不嚴若隱匿者自當治罪何謂株連趙開心兩經革職特與赦宥擢用不思實心爲國輒沽譽市恩殊失大臣之誼著降五級調用○免湖廣石門縣去年被災額賦○壬辰諭兵部朕承 皇天眷命統一寰區滿漢人民皆朕赤子豈忍使之偏有苦樂近見諸臣條奏於逃人一事各執偏見未悉朕心但知漢人之累不知滿洲之苦在昔 太祖 太宗時滿洲將士征戰勤勞多所俘獲兼之土沃歲稔日用充饒茲數年來迭遭饑饉又用武

遐荒征調四出月餉甚薄困苦多端向來血戰所得人口以供種地牧馬諸役乃逃亡日眾十不獲一究厥所由奸民窩隱是以立法不得不嚴若謂法嚴則漢人苦然法不嚴則窩者無忌逃者愈多驅使何人養生何賴滿洲人獨不苦乎歷代帝王大率專治漢人朕兼治滿漢必使各得其所家給人足方愜朕懷往時寇陷燕京漢官漢民何等楚毒自我朝統率將士入關翦除大害底於敕甯卽今邊隅遭孽殘虐百姓亦藉滿洲將士驅馳掃蕩滿人既救漢人之難漢人當體滿人之心乃大臣不宣上意致小臣不知小臣不體上心致百姓不知及奉諭條奏兵民疾苦反借端瀆陳外博愛民之名中無爲國之實若使法不嚴而人不逃豈不甚便爾等又無此策將任其逃而莫之禁乎朕雖涼德難幾上理然夙夜焦思不遑暇逸惟求惠養滿漢一體霑恩以副皇天降鑒祖



宗委託爾等諸臣當徧曉愚民咸知朕意方是實心報主毋得執迷不悛自干罪戾爾部卽傳諭各官刊示中外○甲午諭吏部朕愛養諸臣視同一體原欲其實心爲國共圖治安是以屢次訓誡常恐爾等胸懷徧私陷於罪戾至訓誡不改則愛養之道亦窮國憲具存豈能曲貸卽如逃人一事屢經詳議立法不得不嚴昨頒諭旨備極明切若似此執迷違抗徧護漢人欲令滿人困苦謀國不忠莫此爲甚朕雖欲宥之弗能矣茲再行申飭自此諭頒發之日爲始凡奏章中再有干涉逃人者定真重罪決不輕恕○乙未調李呈祥爲倉場侍郎由兵部左調以周亮工爲戶部右侍郎由左副都御史遷王爾祿爲刑部右侍郎由大理寺卿遷○丙申大學士党崇雅瀕行赴南苑陛辭上召見賜茶溫語慰勞良久命大學士車克送之○裁陝西西安左衛右所右衛中所中衛岷州衛前後二所潼關衛洮

州衛左前後三所平原衛慶陽衛靖遠衛左右中後四所固原衛

河州衛右中前後四所秦州衛後所蘭州衛左右後三所臨洮衛

右中後三所漢中衛右所及河東所以甘州中護衛歸併蘭州衛

○禮部議覆吏部啟心郎苗澂韓世琦奏八旗子弟應於每旗選

兼通滿漢文義者各一員令其教習三年考覈一次如果教習子

弟有成多蒙任用者即將教習之員升遷紀錄如不盡心教習子

弟以致不堪任用其教習之員聽吏部議處庶八旗子弟皆兼通

滿漢足充任用教習亦各知懲勸從之○庚子以沙世悌爾爲理

藩院侍郎由甲喇章京遷○調黃徽允爲兵部左侍郎以原毓宗爲兵部

右侍郎由宗人府府丞遷○以曹溶爲左副都御史由左通政遷○調佟國器

爲南贛巡撫宜永貴爲福建巡撫○初吏科副理事官彭長庚一

等精奇尼哈番許爾安各上疏稱頌睿王元功請復爵號修陵墓

下議政王貝勒大臣會同斟酌密議具奏至是王等議長庚奏言  
太宗勅業盛京同事諸王俱樹勳勞而睿王之功爲冠 太宗  
上賓之後睿王與諸王貝勒大臣等堅持盟誓扶立 皇上鞠躬  
任事等語查 太宗勅業遴選諸王六曹各設一王分猷以亮庶  
務從未曾以睿王功大推爲冠首此其欺誑者一也卽 太宗賓  
天之後兩旗大臣叔和碩鄭親王與睿王及諸王等共推 皇上  
御極原非睿王獨效忠誠此其欺誑者一也又言奸人煽惑離間  
骨肉如郡王阿達禮貝子碩託私謀擁戴睿王乃執持大義立置  
典刑查阿達禮碩託之伏法原非出於睿王之忠誠當 皇上御  
極遠邇歸心諸王貝勒大臣對天盟誓各矢報效不意阿達禮碩  
託不軌謀於禮親王禮親王差諭睿王言詞迫切睿王懼罪及己  
是以出首此其懸揣妄言者一也又言睿王奉命統兵收拾明疆

大權在握關內關外咸知有睿王一人彼時 皇上沖齡遠在盛

京彼若肆然自帝誰能禁之而乃先驅綏定肅整鑾輿恭迎 皇

上登御大寶查睿王克取明疆並非秉權獨往當我朝有故之秋

仍行征討爰命叔和碩鄭親王率兵攻克山海關外中後所前屯

衛中前所三城凱旋之後聞流寇攻陷燕京乃公議叔和碩鄭親

王居守以佐理 皇上機務而遣睿王出師往取燕京彼時燕京

不過一空城耳有何偉績乎克城之後遂目無鄭親王既坐收金

帛更專擅威權國家此際岌岌乎殆矣夫燕京一城卽他王攻取

亦勢在必克此其妄援欺誑者又一也又言睿王初薨尙無異議

爲時無幾朝論紛起論罪削爵毀滅過甚查睿王亡後恩禮甚渥

伊之近臣蘇克薩哈詹代穆濟倫將伊王私匿 御用東珠數珠

黃袍等件並不法等情出首審實始行追奪爵號何謂朝論紛起

毀滅過甚此其欺誑者又一也又言詢之故老聽之傳聞前後予奪之間似不相符查長庚分屬新進所詢故老何人所得傳聞者又是何人又言肅王妃瀆亂一事愆尤莫掩然功多罪少應存議親議故之條查睿王將肅王無因戕害收其一妃又將一妃私與伊兄英王此罪尙云輕小何罪爲大睿王議親是矣肅王又皇  
上何人獨非親乎明欲變亂國法巧爲引議耳又言睿王私匿帝服御用等物必由彼傳諭織造早晚齋送進御彼時暫貯王府不可與一切私匿御用者同例而議竊思進上御衣暫貯王府情或有之但睿王專製帝服隨身備用及至死後伊寵妃吳爾庫尼將黃袍交與詹代密屬送至柩內此並非暫貯之物詹代等首告接出此又其欺誑者一也又言方今皇上宵旰求甯而水旱相繼似同風雷之警或其中不無冤抑伏思睿王在日豈無水

旱之虞卽今日亦並無風雷之警何得以金滕比擬此又其妄引之罪一也又言賜之昭雪復其爵號一以彰 太祖之有子 太宗之有弟 皇上開勅之有臣且以見 太宗知人之明並以勸諸王作忠之氣幽明交感災眚可弭率皆狂惑之心悖妄之語起釁倡亂大干法紀至於援引成王周公事蹟以比睿王尤屬乖謬夫武王繼商而立封周公之子伯禽於魯特命周公攝守國政睿王攝政曾奉有 太宗之特命乎周公誅管叔放蔡叔於郭鄰以其同武庚叛也肅王亦曾有叛情乎且睿王圖肅王之元妃又將一妃給伊兄英王周公曾有此行乎睿王與伊奸黨同謀離間皇上侍衛勒幸伊家周公又有此行乎睿王以避痘爲名奉 皇上遠幸邊外西喇塔喇地方侍衛不及百人又乏扈從之兵時經長夏勢甚孤危周公又有此行乎睿王蓋造伊府及伊弟豫王與

英王子勞親第宅糜費帑金數百萬以致兵餉空虛給與他物抵充周公又有此行乎睿王於海子內起建避痘處所私動內帑擅差部員苦累官工夫 皇上一切營建止用內府工匠而睿王私役官工周公又有此行乎尤可異者睿王欲離 皇上私與所屬黨臣定計駐紮永平又擅取朝鮮國王族女一女不足其欲又娶一女未至而身亡又 太宗時英王被論因罰出公邊必隆等三牛彖及甫至燕京睿王擅將此三牛彖取還英王下又將黃旗下剛林何洛會巴爾達齊三族取入伊旗下又 皇上六近臣曾各盟誓效忠 皇上而睿王徧勒敗盟又毀壞 太祖 太宗定例於八旗遴選美女取入伊家又敗亂國體遣使於新服喀爾喀處求取有夫之婦又濫費公帑將織造江南蘇杭段疋不入公家匿爲己有充賞比倖種種不法情狀眾目共見其餘瑣細敗檢之事

不可勝計昔周公敬承王命上合天心矢忠攝政輔佐成王成王少長稽首歸政終身克盡臣道作周孚先是以成王追崇功德永錫爵土今睿王方入燕京逆天專政肆行無忌至皇上茂齡仍不歸政篡迹彰著天厭其惡不終其年似此罪魁且言功侔周公可乎此輩陽應求言陰圖搆亂違天悖上紊亂朝綱煽惑國家情罪甚大雖當開言路之時難以宥免許爾安奏內情辭與彭長庚無異請敕該部將彭長庚許爾安各革職擊問重擬得旨彭長庚許爾安革職著議政王貝勒大臣會同從重擬罪具奏○福建巡撫佟國器獲同安侯鄭芝龍與其弟鴻逵子成功交通私書羈其使具奏封進下兵部密議○厄魯特部台吉杜喇爾渾津等來貢○辛丑增鑿儀衛主事一筆帖式六○壬寅免湖北鄖陽襄陽二府去年被寇額賦○甲辰賜殿試滿漢貢士圖爾宸史



大成等進士及第出身有差○丁未鄭親王濟爾哈朗等議奏續順公沈永忠統率重兵保障西南受茲重任不能鼓舞將士堵禦逆賊固守地方一聞沅靖武岡失陷遂退回寶慶長沙喪師失地貽誤封疆按律當斬但永忠曾偕伊叔志祥投誠功大應免死削爵爲民所遺公爵准與伊弟兄承襲從之○己酉議政王貝勒大臣會議彭長庚許爾安妄稱睿王元功瀆奏長庚應論斬立決家產籍沒妻子爲奴爾安亦論斬立決爾安之父定國投順有功所襲世職應與他子承襲其家產給與襲職之子得旨睿王逆天擅政圖築種種不法彭長庚許爾安乃敢稱頌元功悖逆紊亂情罪重大本應正法但係奉旨條奏之時姑免死著流徙甯古塔地方彭長庚家產籍沒許爾安父定國投順有功世職准定國他子承襲家產給與承襲之人○鄭親王等議奏胡章捏款誣陷平南王

尙可喜靖南王耿繼茂與誣告凡人不同情罪重大應立絞得旨  
胡章所誣未至死罪遽坐以死律無正條朕心不忍著免死革職  
永不敘用○庚戌以王永吉兼管吏部尙書事○壬子諭禮部朕  
惟帝王敷治文教是先臣子致君經術爲本自明季擾亂日尋干  
戈學問之道闕焉未講今天下漸定朕將興文教崇經術以開太  
平爾部卽傳諭直省學臣訓督士子凡經學道德經濟典故諸書  
務須講求淹貫博古通今明體則爲真儒達用則爲良吏果有此  
等實學朕當不次簡拔重加任用又念先賢之訓仕優則學仍傳  
諭內外大小各官政事之暇亦須畱心學問俾德業日修識見益  
廣佐朕右文之治○癸丑諭內三院朕惟自古帝王勤學圖治必  
舉經筵日講以資啟沃今經筵已定於文華殿告成之日舉行日  
講深有裨益刻不宜緩爾等卽選滿漢詞臣學問淹博者八員以

原銜充日講官侍朕左右以備諮詢仍傳諭禮部速擇開講吉日以聞○督捕侍郎梁清遠請假遷葬允之

夏四月乙卯加馮銓少師兼太子太師金之俊少傅兼太子太傅

劉正宗陳之遴劉昌少保兼太子太保○丁巳停選漢軍庶吉士

○庚申以霍達爲督捕侍郎

由大理寺卿遷

○辛酉喀爾喀部額爾德尼

諾穆齊門章墨爾根楚虎爾伊世稀布額爾德尼額爾克戴青諸

台吉以侵掠巴林遵旨服罪來朝貢優賞之○壬戌四川巡撫李

國英奏今滇黔未靖徵兵轉餉湖南兩廣俱有重兵平西王李國

翰之兵見屯漢中蓄銳甚久誠能分道並進首尾夾擊賊力有幾

豈能四面支持是誠一勞永逸之計萬一機會有待請先敕平西

王李國翰率兵駐鎮保甯爲各路之統領遣將先取成都資其肥

饒且屯且守次取重慶以扼咽喉然後乘流東下進定夔關以通

荆襄之氣脈撤滇黔之門戶卽爲收滇黔之張本蓋從古取滇黔者未有不由於取蜀也至於內外文武必同力一心事乃底績所嚴飭諸臣凡有司兵司餉之責者須如臂指相應勿使掣肘此尤成功之根本而滅賊之要務下所司密議○乙丑免河南沈邱縣及懷慶衛去年被災額賦○戊辰贈陣歿輕車都尉許朝官等官○丙子諭禮部朕惟人臣事君勿欺爲本近來進呈登科錄及鄉會殿試等卷率多隱匿年歲以老爲壯以壯爲少甚至染雜鬢髮飾貌美觀國家開科取士本求賢良進身之始卽爲虛僞將來行事可知更有相沿陋習輕聯同宗遠託華胄異姓親屬混列刊布俱違正道朝廷用人量材授任豈論年齒家世乎今科進士登科錄及以後各試卷務要據實供寫其餘陋風悉行改正毋負朕崇誠信重廉恥至意○丁丑進封和碩親王尼思哈爲和碩敬謹親

王親王齊克新爲和碩端重親王○已卯諭內三院考選庶吉士原欲儲養眞才以備任用必須懋勉學問時加策勵乃能練習典故博通文章無負朕親行簡拔之意除照舊教習館試院試外今後滿漢庶吉士同讀書一甲翰林每二月朕必面試一次以辨勤惰高下每歲六試永著爲令○初開日講○庚辰兵部左侍郎黃徽允以才識平常致仕○壬午子故大學士高爾儼祭十一次賜葬謚文端贈少保廕一子爲中書舍人○癸未詔修 太祖 太宗聖訓○ 上以定南武壯王孔有德建功頗多以身殉難特賜其女食祿視和碩格格護衛儀從俱仍舊

五月乙酉以圖海兼刑部尙書○丁亥轉原毓宗爲兵部左侍郎

以孫廷銓爲兵部左侍郎管右侍郎事

原任戶部左侍郎

○遣精奇尼哈

番祁他特車爾貝等齎敕諭喀爾喀部土謝圖汗丹津喇嘛車臣

汗墨爾根那顏等曰曩因爾等抗違諭旨故數次不納來使今爾等遵奉朕言誠心引罪遣額爾德尼諾穆齊門章墨爾根楚虎爾伊世希布額爾德尼額爾克戴青四台吉歲貢來朝朕不咎既往將應還巴林缺少人畜悉從寬免茲特遣大臣前來爾等可以修好之故面堅盟誓每歲照常額進貢交通貿易朕亦不靳賞賚既盟之後爾逃人至此亦不收納仍行送還若不修好堅盟卽進貢朕亦不納逃人至此仍命收納且加恩養爾其識之○戊子免陝西延安等五府地震被傷額賦○辛卯和碩鄭親王濟爾哈朗薨年五十七○壬辰諭禮部和碩鄭親王薨應行典禮比他王不同各部院七日勿奏事○甲午禮部奏營造和碩鄭親王寢園照例應給銀五千兩得旨著再加恩給五千兩○江南總督馬鳴佩奏僞伯陳其綸負固瑞金後又依附鄭逆嘯聚大柏山內南贛總兵

官胡有升遣參將孔國治等進剿其綸敗竄甯都界內天心寨土人斬首以獻下所司察敘○丁酉命固山額眞石廷柱爲鎮海將軍駐防京口○己亥浙江福建總督屯泰奏原任福建左布政使今升戶部侍郎周亮工欺君虐民大貪極惡列款以聞令亮工回奏○庚子以覺羅巴哈納爲內翰林弘文院大學士由戶部尚書遷○辛丑固山貝子吳達海薨諡襄敏○山西靈邱縣地震有聲○壬辰工部右侍郎傅景星以病乞假允之○甲辰裁直隸興州後屯衛歸併通州左衛大同衛歸併河間衛茂山衛歸併保定左衛紫荆所歸併保定右衛○乙巳調覺羅郎球爲戶部尚書由禮部調以布丹爲工部侍郎由阿思哈尼哈番遷○俄羅斯察漢汗遣使來貢○丙午調李際期爲兵部尚書由工部調○丁未以恩格德爲禮部尚書由左侍郎遷○賜和碩鄭親王卹典如例仍加祭一次○己酉以衛周祚爲工

部尙書

由吏部左侍郎遷

朱鼎延爲工部右侍郎

由通政使遷

○予故刑部侍

郎林德馨祭

六月甲寅免浙江杭州南波金華衢州台州去年被災額賦○乙

卯以祁徹白爲禮部右侍郎

由學士遷

○初禮部奏靖南王耿繼茂咨

稱子精忠昭忠年已長成應請締結婚姻不敢擅便惟候 上裁

奉旨會同內大臣議奏至是議靖南王耿繼茂之父有攜眾航海投誠功且繼茂身任巖疆今伊二子結姻不敢專擅請求仰承

皇上報功恤勞仁德至意宜以親王等女下嫁得旨和碩顯親王

姊賜和碩格格號下嫁耿精忠固山貝子蘇布圖女賜固山格格

號下嫁耿昭忠○定賜卹外藩蒙古例○丁巳賜名紫禁城後山

爲景山西華門外臺爲瀛臺○壬戌故明宗姓朱以檠謀叛伏誅

○子故理藩院侍郎尼堪祭葬諡勤愨○癸亥以高景爲兵部右



侍郎

由宗人府  
府丞遷

○乙丑朝鮮來貢

○丁卯諭刑部等衙門朕日覽

三法司奏章議決重囚一日必五六人或十餘人念茲愚氓兵戈災祲之後復罹法網深可憫惻稽古有虞之世民不犯於有司漢文帝唐太宗亦幾致刑措今犯法者眾豈果風俗日偷民盡醫不畏死歟抑朝廷德教未敷故百姓從化無路歟或讞決諸臣膠執爰書輕於失入歟又或所在有司不肯畱心化導以致扞網紛紛歟干和召戾皆朕之責今後爾等問刑各衙門大小諸臣遵奉此諭即將見在未結各案悉心清理原情準法務求平允但不得故縱市恩仍傳諭各直省督撫申戒所屬愼重刑獄不得羅織刻覈郡邑長吏亟倡明教化使小民明於親遜之誼各愛身家毋輕抵罪自然獄案漸減囹圄可空其仰協天心漸致太平未必不由於此若奉行不力負朕好生至意必不輕貸○戊辰免直隸房山縣

去年被水額賦○定南靖寇大將軍陳泰等奏僞安南王劉文秀率僞將軍盧明臣僞興國侯馮雙禮等賊眾六萬船千餘艘分兵由常德攻岳州武昌文秀自畱攻常德護軍統領蘇克薩哈伏兵邀擊之焚獲船艘甚多賊眾大敗明臣赴水死雙禮被重創降其僞副將等四十餘員文秀遁走貴州下兵部察敘○辛未遣大理寺卿吳庫禮等往視黃河大王廟決口○壬申兵部議准浙閩總督屯泰奏沿海省分應立嚴禁毋許片帆入海違者立賞重典從之○卹衡州及海澄陣歿將校○己卯封承澤親王碩塞子博果鐸爲和碩莊親王○辛巳命工部立內十三衙門鐵牌敕諭曰中官之設雖自古不廢然任使失宜遂貽禍亂近如明朝王振汪直曹吉祥劉瑾魏忠賢等專擅威權干預朝政開廠緝事枉殺無辜出陣典兵流毒邊境甚至謀爲不軌陷害忠良煽引黨類稱功頌

德以致國事日非覆轍相尋足爲鑒戒朕今裁定內官衙門及員  
數職掌法制甚明以後但有犯法干政竊權納賄屬託內外衙門  
交結滿漢官員越分擅奏外事上言官吏賢否者卽行浚遲處死  
定不姑貸特立鐵牌世世遵行

臣周倫潤蕃恭校

秋七月癸未朔日有食之○甲申吏部左侍郎梁清標以生母故請假治喪命給假三月依限回部供職○戶部右侍郎周亮工遵旨回奏逐款陳辯得旨知道了周亮工解任候勘這辯款情節著該撫按一併詳察確議速奏○乙酉給事中季開生奏近日臣之家人自通州來遇吏部郎中張九徵回籍其船幾被使者封去據稱奉旨往揚州買女子恐奉使者不能仰體宸衷借端強買小民無知未免驚慌必將有嫁娶非時骨肉拆離之慘且乘機而奸棍挾仇捏報官牙壟利那移諸弊斷不能無乞皇上速收成命得旨前內官監具奏乾清宮告成在卽需用陳設器皿等項合往

南省買辦故令發庫銀遣人往買初無買女子之事 太祖 太

宗制度宮中從無漢女且朕素奉 皇太后慈訓豈敢妄行即天

下太平之後尙且不爲何況今日朕雖不德每思效法賢聖之主

朝夕焦勞屢次下詔求言上書禁勿稱聖惟恐所行有失若買女

子入宮成何如主耶季開生身爲言官果忠心爲主當言國家正

務實事何得以家人所聞茫無的據之事不行確訪輒妄捏瀆奏

肆誣沽直甚屬可惡著革職從重議罪具奏尋部議應杖一百折

贖流徙尙陽堡從之○庚寅子故南贛巡撫劉武元祭九次加祭

一次賜葬○壬辰復遣廷臣恤刑各省○以曹溶爲戶部右侍郎

由右副節  
御史遷

○己亥以孫建宗爲左副都御史

由大理  
寺卿遷

○子故直隸

河南山東總督馬光輝祭九次復加祭三次竝賜葬○丙午禮部

奏我朝自 太祖 太宗以來有陣亡大臣忠直元老應賜諡立

碑以昭報功之典從之○轉范登仕爲江西左布政使

由右布政使轉

陳培禎爲河南右布政使

由山東按察使遷

○辛亥命直省各繪所轄輿

圖進覽

八月癸亥命固山額真阿爾津爲甯南靖寇大將軍同固山額真卓羅等駐防荊州固山額真祖澤潤分防長沙○庚午左都御史龔鼎孳等奏刑部請停秋決一疏已奉諭旨其所停者似專指在外而言臣謂內外奉行畫一更足廣昭德意嗣後每遇恤刑內外暫行停決以彰一視之仁得旨照所請行著爲令○辛未封貝勒杜爾祜子敦達爲固山貝子○癸酉諭工部畿輔之地乃天下根本必加意安養使民生樂業方能自近及遠漸致太平前爾部會同戶禮兵三部覆奏修築運河決口議將直隸八府州縣節年所欠各部寺錢糧速行催解以濟修河急用朕念畿內地方人民艱

苦房地屢經圈撥水旱連歲相仍既缺養贍之資俱有身家之累而歷年積欠一旦並徵其何以堪殊非加惠近畿篤厚根本之意朕心深爲不忍爾部仍會同各部將修築決口應另用何項錢糧悉心籌畫確議速奏其直隸八府州縣順治八年至十一年未完錢糧實欠在民者悉與蠲免毋容官吏蒙混徵收著該督撫按徧行榜示諭眾通知○免山東曹城武等七州縣及臨清衛齊河屯去年被水額賦○甲戌以秦嘉兆爲江西右布政使由按察使遷胡文棊爲山東按察使由陝西關西道參政遷○丙子予故兵部尙書張秉貞延綏巡撫董宗聖祭葬

九月癸未免安徽鳳陽被水額賦○贈陣歿都司汪吉官○庚寅以原任戶部右侍郎趙開心爲太僕寺寺丞○辛卯諭吏部國家官人原當內外互用以勵羣材近見外官內轉京官外任者多能

稱職宜再行互用除翰林官員朕自裁定其六部卿寺等衙門官員有才優經濟堪任牧民者著各堂官開列六科官員著吏科開列各道御史著都察院開列通送吏部會同都察院察覈速奏其在外司道等官品行著聞政治卓越者確察實蹟遇缺內轉務使內外得人職事修舉以副朕圖治安民之意○壬辰遣官祭故明殉難侍郎孟兆祥等八人○癸巳諭吏部前以在京各衙門官員各堂官開送吏部會同都察院察覈速奏已有諭旨復念侍郎等官及科道官皆朕素所信任必親加裁定酌用內外庶盡隨材器使之心爾部卽傳諭行○以樓希吳爲江西按察使由河南汝南道參政遷○丁酉禮部侍郎祝萬春以病免○裁陝西定邊同知歸併靖邊同知管理○己亥諭吏部翰林院官員簡擢中祕習知法度今用人孔亟必得文行兼優者以學問爲經濟庶能飭法惠民助登上



理茲朕親行裁定陳煥黃志遴王無咎楊思盛藍潤王舜年范周  
馬葉曾沈荃陳彩鄧旭徐必達于朋舉王勰耿介崔之瑛湯斌盧  
高皆品行清端才猷贍裕信任既久圖報必殷著各照外轉應得  
職銜升一級用遇缺卽補各官須益矢忠勤興利除弊副朕圖治  
安民至意○贈陣歿阿達哈哈番章徵等官○壬寅命會試中式  
武舉照文進士一體殿試○靖南將軍固山額真朱瑪喇護軍統  
領敦拜等凱旋○裁山東任城衛中前後三所平山衛右後二所  
東昌衛中所濮州所濟甯衛右前後三所臨清衛左後二所青州  
左衛右中前後四所安東衛左前二所萊州衛右中前後四所靈  
山衛左後二所鰲山衛左後二所登州衛左右前後四所威海衛  
左前二所成山衛左前後三所靖海衛左右後三所大嵩衛中前  
二所歸併肥城所於濟南衛滕縣所於沂州衛諸城所於莒州衛

膠州所於靈山衛甯津所於靖海衛奇山所於甯海衛海陽所於  
大嵩衛○子故工部侍郎陳有明祭葬○乙巳浙江按察使陳喆  
以叛弁脫逃降三級調用○丙午頒 御製資政要覽範行恆言  
勸善要言做心錄於異姓公以下文官三品以上各一部○戊申  
免甘肅兩當甯遠二縣被災額賦○廣東左布政使王鹽鼎以老  
病休致○吏部議奏翰林官外升職銜正詹以布政使用支正二  
品俸少詹以布政使用侍讀學士以按察使用侍讀中允以參政  
用編修檢討以副使用部寺科道官外升職銜侍郎副都御史通  
政使大理寺卿以布政使用支正二品俸太僕寺少卿順天府府  
丞以按察使用光祿寺少卿以參政用六科左右給事中以副使  
用給事中以參議用監察御史以副使用從之○庚戌命平南王  
尚可喜子之信品級與異姓公同

冬十月辛亥朔設尙寶司衙門滿洲理事官一副理事官二譯滿

漢字他赤哈哈番一滿洲筆帖式二漢官卿一少卿一司丞一○

甲寅致仕工部左侍郎張紹先卒○轉朱鼎延爲工部左侍郎以

程正揆爲工部右侍郎

由太僕寺卿遷

○以杜篤祐爲戶部右侍郎

由宗人府

遷

魏裔介爲左副都御史

由太常寺少卿遷

○以浙江右布政使李日

芳爲通政使○癸丑 上親試武舉於景山○丁巳諭吏部等衙

門朝廷機務皆關國計民生凡各部院衙門辦理覈議覆奏之事

自當竭忠盡慎夙夜匪懈俾機務早竣方爲無忝職守乃邇來推

諉耽延有遲至數月者有遲至數十日者殊負朕孜孜望治之意

自今以後奉旨下部應本部議覆者限十日內具奏需各衙門咨

會者限二十日內具奏如或踰限重治不貸其有刑名錢穀等事

繁劇重大勢難卽完者先行奏明展限著通行申飭○戊午賜于

國柱等武進士及第出身有差○己未贈廣東死事都司李興龍

官○庚申喀爾喀部土謝圖汗丹津喇嘛車臣汗墨爾根諾顏等

以和好約誓奏聞○辛酉詔每年六月內審定立決重犯俟七月

具奏正法永著爲例從左都御史龔鼎孳請也○壬戌以王國雄

爲禮部侍郎由梅勒章京遷○以山東右布政使于之仕爲太常寺卿○

免直隸磁獲嘉等八州縣被災額賦○甲子免直隸隆平縣十一

年以前逋賦及山東淄川等八縣被蝗額賦○以趙開心爲太僕

寺少卿協理兵部督捕事務○贈湖廣死事副將楊國勳等官○

乙丑諭內院中書不准考選科道著爲令○以曹溶爲廣東左布

政使由原任戶部右侍郎遷李士焜爲浙江右布政使由工部左侍郎遷王無咎爲

浙江按察使由弘文院侍讀學士遷楊思盛爲山西按察使由國史院侍讀學士遷○

革原任浙閩總督劉清泰職以憲臣龔鼎孳劾其不候交代回駐

杭州以致漳州失陷也○丙寅免直隸宣府大同被災額賦○贈死事永州府知府紀國相等官廕○丁卯贈原任延綏巡撫董宗聖爲兵部右侍郎廕一子入監讀書○戊辰諭吏部朕每覽法司覆奏本章龔鼎孳往往倡爲另議若事係滿洲則同滿議附會重律事涉漢人則多出兩議曲引寬條果係公忠爲國豈肯如此龔鼎孳蒙恩擢任總憲不思盡忠圖報乃偏執市恩是何意見著明白回奏○諭刑部帝王以德化民以刑輔治故律例之設最宜詳慎苟法律輕重失宜則官吏舞文得以任意出入雖欲政平訟理其道無由朕覽讞奏本章引用律例多有未愜爾部所有滿漢字律例作速謄寫進呈朕將詳覽更定頒布遵行○諭刑部朕覽參劾貪官本章賊私盈千累萬及問結擬罪往往脫卸於衙役官旣以賊輕追死而該役又止坐無祿輕條案墨未乾伊等卽鑽營別

衙門充役縱橫盤踞播惡無窮不加嚴處奚以除民害而肅紀綱

嗣後內外問刑衙門審究憲役計贓定擬不許援引無祿輕條凡

情罪重大者分別絞斬其餘俱著流徒爾部卽載入律例仍通飭

行○贈死事賓州知州劉日襄等官廕○己巳諭刑部都察院大

理寺近來三法司奏覆稽延皆由文移往來虛費日月且事不同

審稿不面議豈能得平以後覈擬死罪在京者爾等各堂官面同

研審在外題奏者各將原招詳察明白面同議覆俱當虛心商酌

務期情罪適當律例允協○辛未復設總理漕務滿洲侍郎一駐

淮安○癸酉以孫廷銓爲兵部尙書○以孫建宗爲陝西左布政

使由原任左副都御史遷陳燠爲山東右布政使由詹事遷王含光爲河南按察

使由太僕寺少卿遷○甲戌移宣大總督駐大同○丙子調袁懋功爲吏

部左侍郎管右侍郎事由刑部左調○左都御史龔鼎孳遵旨同奏引罪

上以鼎孽偏執沽名回奏支飾大負擢任下部議罪部議革職  
得旨降八級調用

十一月壬午免山東濱堂邑等十三州縣被蝗額賦○癸未諭滿  
漢文武大小官員等十月十九日有吏部書吏章冕劾頸叩閣訐  
告順天巡按顧仁悖旨婪贓陷害無辜朕念前遣顧仁等巡方時  
曾召至太和殿面諭巡按之差前經停止因此官關繫甚重吏治  
貪廉民生利病皆由之上達故復遣爾等往巡直省朕卽倚爲耳  
目手足爾等當仰體朕意潔己率屬奠安民生若不法受賄負朕  
委任朕則不拘常律雖贓數無多定行正法又召至左翼門再加  
申諭往聞巡按官初至地方亦虛博廉名及至差滿回京多婪取  
贓物爾等若蹈此弊初時廉聲悉置不問必照貪婪例處分朕屬  
望如此殷切誠諭如此嚴明稍有人心者自當遵奉惟謹必不違

朕二次面誠之諭令章冕所告恐未必實隨命提顧仁等到後遣  
內大臣內院大學士將眾犯取齊朕親行研審節次供吐皆經朕  
面鞫具得實情顧仁以巡方御史奉敕不許用舊時蠹役乃復違  
旨收用舊役六人是悖旨藐法其罪一也敕令察訪地方疾苦糾  
劾貪污官吏以安民生乃違旨陷害下役受王士琦章奏求充書  
辦銀兩其罪一也索取章冕賄賂不遂所欲枉法責治且不發順  
天府推官審問而遠發眞定府正恐受賄事露欲將章冕斃命滅  
口其罪一也將衙門供事承差違例私遣至家其罪一也顧仁面  
承敕諭再四諄切輒敢悖旨壞法收蠶納賄深可痛恨朕前諭巡  
按御史違旨受贓不拘常律定罪今顧仁不但壞法受賄且背朕  
兩次面諭爲日無幾藐若罔聞卽置之極刑未足蔽辜賀繩烈以  
刑部司官藐玩國法因巡方御史顧仁係伊同年王士琦章奏欲



充巡按書辦送銀二百兩伊親自援引通同收受其罪一也及章  
冕許送顧仁銀二百兩伊又親行作保貪婪藉法其罪一也賀繩  
烈身為職官寡廉鮮恥倚恃不法巡按居閒行賄卽行正法亦不  
爲枉朕於滿漢諸臣皆視如一體恩養均加今漢臣背恩如此大  
負朕從前愛養之意將顧仁賀繩烈按律重懲以昭炯戒使天下  
臣工從此洗心滌慮共矢潔清朕意如此爾等大小官員其再加  
詳審具奏○轉王爾祿爲刑部左侍郎以楊義爲刑部右侍郎由大  
理寺卿遷○以朱之弼爲戶部右侍郎由宗人府府丞遷○浙江巡撫秦世禎  
奏海逆圖舟山分踪犯穿靠昌石定關下所司速議○甲申轉海  
爾圖爲戶部左侍郎以柯永業爲戶部右侍郎由梅勒章京遷○以吳庫  
理爲戶部右侍郎總理漕務由大理寺卿遷○乙酉諭六科諸臣朕復設  
巡方御史原爲官貪民困令其剔弊釐奸故於額設御史之外特

命慎加選擇必操守清廉品行端謹方副朕意今願仁背旨壞法收役納賄如此匪類由何衙門何官開送何衙門何官准考何衙門何官取中著內大臣鰲拜巴圖魯索尼大學士巴哈納額色黑金之俊成克鞏劉正宗同六科都給事中嚴行確察將開送准考取中緣由並各官職名詳明開列具奏○內大臣三院議政大臣九卿詹事科道等官遵旨會議願仁奉命巡方不遵 皇上訓諭收用積囊納賄行私供證真確應置重典凌遲處死妻孥家產籍沒入官賀繩烈身係法官交通貪墨藐法過贓應立斬得旨願仁本應凌遲處死從寬著卽處斬賀繩烈本應斬從寬著卽處絞餘依議○丁亥諭吏部都察院直省地方設立督撫巡按皆以振肅法紀剔弊發奸且使彼此互爲糾察競砥公忠屬望甚殷責任更重乃近來積習相沿瞻徇情面多參末員屬吏罕有督撫按互相

糾參者非因己先不法恐人訐舉卽係畏嫌避怨甯負朝廷不負朋黨殊非簡命委任之意今特行申諭從此須當大破積習如有貪婪等弊立行指參必拏解來京朕親審定罪儻彼此容隱事發一體連坐決不姑貸○諭吏部日講官侍從禁廷朝夕進講國子監衙門較遠職任難兼如遇祭酒司業員缺不必以日講官推補○諭吏刑二部原任戶部右侍郎周亮工被參一案犯證俱在福建若不質審無憑結案周亮工著革職發該撫按質審定擬具奏○諭刑部貪官蠹國害民最爲可恨向因法度太輕革職擬罪猶得享用贓貲以致貪風不息嗣後內外大小官員凡受贓至十兩以上者除依律定罪外不分枉法不枉法俱籍其家產入官著爲例○子故兵部尙書李際期祭二次賜葬遣官護送回籍○浙江巡撫秦世禎奏舟山副將把成功俛首從賊甯波定海震動乞調

江南滿洲官兵星赴定海關合師會剿下所司速議○戊子 上  
幸南苑○免湖廣鄖陽襄陽兩府逋賦及河南汲淇胙城等被災  
額賦○內大臣巴圖魯公鰲拜等遵旨察出開送願仁者係刑部  
尚書劉昌等舉出者係刑部侍郎王爾祿准願仁考選者係吏部  
尚書王永吉原任左都御史龔鼎孳原任左副都御史曹溶薦卷  
係王爾祿准取係龔鼎孳得旨王爾祿王永吉龔鼎孳曹溶著九  
卿科道等官會同從重議處具奏劉昌等分別議奏尋議上得旨  
王爾祿降五級調用龔鼎孳再降三級用王永吉降一級留任曹  
溶降一級仍赴廣東任劉昌袁懋功衛周祚各罰俸六箇月○辛  
丑初定例喀爾喀部土謝圖汗車臣汗丹津喇嘛墨爾根諾顏畢  
席勒爾圖汗魯卜藏諾顏車濟農坤都倫陀音此八扎薩克每歲  
進貢白駝各一白馬各八謂之九白年貢我朝賞每扎薩克銀茶

筒各一重三十兩銀盆各一段各三十青布各七十以答之至是  
土謝圖汗丹津喇嘛車臣汗墨爾根諾顏各遣使遵例進貢賞賚  
如例並賜宴○乙巳諭禮部朕自卽位以來凡 郊祀大典必誠  
必敬閒有遣代亦必如禮致齋昨二十五日冬至祀 天已遣額  
爾克戴青恭代但因駐蹕南苑致齋日期爾部未經奏明內院諸  
臣亦未奏知偶失記憶忽焉猛省不勝悚惕朕爲 天之子昭事  
當虔既有疏忽何敢自隱卽選擇吉日祇申祭告○丙午禮部奏  
臣等跪誦諭旨不勝惶懼竊思 皇上因致齋日期偶失記憶猛  
省悚惕特降諭旨擇吉祭告仰見 皇上敬 天之誠意臣部爲  
本月二十五日冬至令節 郊天一事具奏未經奏明致齋日期  
應敕吏部議處其祭告日期欽天監擇於本月二十九日照例遣  
大臣一員行禮得旨依議失憶齋戒過在朕躬爾等俱免議○河

南新鄉縣秋禾無收該督奏請以麥代米部議不允 上以民窮可憫准以麥代米○丁未裁陝西雒南縣縣丞○己酉諭吏部都察院直省地方設總督巡撫都御史巡方巡鹽巡漕巡倉巡視茶馬各御史凡有舉劾朝廷卽黜陟用昭勸懲必公正廉明然後是非不謬舉劾允當今革職正法巡按御史顧仁背旨壞法收蠶納賄已經敗露其入境以後參劾奏章豈能秉公執法全無冤枉著該督撫將顧仁糾劾原疏虛公詳察如被劾之人果係奸貪不得令其借口展脫如中有情事冤抑未愜輿論者卽與剖明緣由具奏

十二月辛亥朔賜內大臣伯索尼敕曰卿秉資忠質制行端恭大節丕著於國家小心無數於險阻自 皇考時卽爲近臣據忱弼諧朝廷之大業攸濟批鱗直諫人臣之分誼允昭是以鑒爾忠忱

倚爲手足用輔朕躬方先帝升遐之時正羣小異議之日爾克持大義糾正罪人朕嗣位入關以來欲酬大動用彰寵渥不意逆圖起於骨肉邪黨共助奸謀媚嫉忠良謂其異己眾人皆爲側目惟爾獨不動心至於困之於遷流餌之以美爵終持不回之志永堅勿貳之心迨後殲除國奸朕乃躬親大政爾又克殫謨猷無負任使和衷以濟擇善而行頃因皇后遭疾甚危朕心實爲憂慮以爾敬慎能副朕懷是以簡任內廷俾之保護爾立心精白任事勤勞慮無不周能無不備遂爾勿藥而愈立奏康和上釋聖母顧慮之懷下慰臣民仰望之意朕心不勝嘉悅可謂國之蓋臣乃心王事者矣故特降溫綸用旌殊績稽之往古不乏純臣或以直節稱或以忠烈著以爾方之於古尤覺爲優社稷之臣爾之功勳無愧腹心之佐朕之倚毗方殷欽哉○壬子子死事彝陵州訓導

張作肅官○癸丑以大學士成克鞏兼管左都御史事○己未山

西右布政使董應徵以苛派累民降調○癸亥免浙江安吉等十

州縣及宣化八衛被災額賦○甲子以許宸爲江南按察使由原任順

天府府丞遷○乙丑免山東臨清等十州縣及東昌衛被災額賦○增

松江府水利通判一○丙寅先是僞部院朱盛濃同弟盛添聚眾

富川句結土寇王心蔣乾相等及八九兩都徭獍肆行劫掠爲孫

可望李定國應援楚粵被患廣西巡撫于時躍同提督伯線國安

右翼總兵官全節侍衛李茹春湖廣總督祖澤遠調發提標遊擊

彭麟道州參將李東斗等進剿馘其渠首斬獲甚眾九團兩都一

百九十二寨悉平至是捷聞○己巳多羅敏郡王勒度薨年二十

○辛未子故宣大山西總督佟養量祭葬贈右都御史廕一子入

監讀書○壬申副都御史佟國允以疾請解任允之○癸酉免直



隸涿慶雲等三十三州縣及永平等衛被災額賦○以黃志遠爲

湖廣右布政使

由少詹事遷

○甲戌諭吏部操江巡撫東南重任須得

素練情形者就近受事秦世禎著調補操江巡撫其浙江巡撫員

缺以陳應泰調補山西巡撫員缺以白如梅升補應得職銜爾部

開列具奏○命固山額真伊爾德爲甯海大將軍統兵勦舟山賊

寇

本紀伊作宜

○予故操江巡撫李日芑祭十次賜葬○免浙江臨海

等十八縣及河南祥符蘭陽二縣懷慶羣牧二衛被災額賦○朝

鮮來貢○是歲人丁戶口一千四百三萬三千九百有奇田地山

蕩三百八十七萬七千七百一十九頃九十一畝有奇畦地二萬

二千九百八十箇徵銀二千二百萬五千九百五十四兩有奇米

麥豆五百七十六萬八千七百一十三石八斗有奇草四百六十

二萬九千三百一十六束茶八萬六千七百七十八筥行鹽四百

九萬八千一百三十八引徵課銀二百二十三萬一千九百四十  
兩有奇鑄釐錢二十四萬一千三百八十七萬八千八十有奇舊  
鑄銅錢一十八萬六千二百一十有奇鈔一十二萬八千一百七  
十二貫四百七十有奇